

四庫全書

史部

欽定四庫全書

史部

資治通鑑考異卷二

詳校官修撰_臣錢 榮

洗馬_臣王坦修覆勘

總校官庶吉士_臣張能照

校對官編修_臣裴 謙

謄錄監生_臣金士虔

欽定四庫全書

史部二

資治通鑑考異

附通鑑
釋例

編年類

提要

臣等謹案資治通鑑考異三十卷宋司馬光撰光編集通鑑時有一事用三四出處纂成者因參考異同別為此書以正其謬誤而歸之于一蓋前代紀事之書傳聞異詞裨官固喜造虛言本史亦不皆實錄光所採書自正

史外相傳凡二百二十二家如司馬康所述
有司馬彪荀悅袁宏崔鴻蕭方等李延壽及
太清記唐厯之類洪邁所摘有河洛記魏鄭
公諫錄李司空論事張中丞傳涼公平蔡錄
鄴侯家傳兩朝獻替記後史補金鑿密記彭
門紀亂平剡錄廣陵妖亂志之類其他百家
譜錄正集別集墓誌碑碣行狀別傳無不旁
搜博引抉摘幽隱擇可信者而從之有舊史

所不詳者亦必叅互考證而明其所以闕疑
之故既著其文於通鑑又本棄取之意辨論
而折衷之使讀者曉然於紀載之得失是非
而不復有所岐惑千古史法之精密實未有
過于是者其後李燾續長編李心傳繫年要
錄尚知其義故所紀特為審核至陳桎薛應
旂輩欲追續光書而不能網羅極備僅據本
史編排尋條失枝貽譏舛陋則亦考異之法

不明有以致之矣。其中或有過信小說為後人所議及如唐闕播平章事拜罷專引舊唐書而不及新唐書紀傳年表以證其誤亦不免小小滲漏。然卷帙太繁所謂牴牾不敢保者。光固已自言之要不足為其累也。考異原與通鑑並行。胡三省作音註始以散入各文之下。故今通鑑本俱附入書內而亦頗有漏略。此乃明初所刊單本。猶光原書卷第故錄。

之以存其舊云

臣等謹案通鑑釋例一卷宋司馬光撰皆其
修通鑑時所定凡例後附與范祖禹論修書
帖二通有光曾孫尚書吏部員外郎伋跋語
稱遺稿散亂所藏僅存脫略已甚伋輒掇取
分類為三十六例末題丙戌仲秋乃孝宗乾
道二年胡三省通鑑釋文辨誤序謂光沒後
通鑑之學其家無傳後因金使問司馬光子

孫朝廷始訪其後之在江南者得從曾孫伋
使奉公祀凡言書出於司馬公者必鋟梓行
之蓋伋之始末如此其編此書時嘗有浙東
提舉常平茶鹽司板本惟伋跋稱三十六例
而今本止分十二類蓋并各類中細目計之
也伋又稱文全字闕者伋亦從而闕之而今
本並無所闕則已非原刻之舊胡三省又云
溫公與范夢得修書二帖得於三衢學宮與

劉道原十一帖則得於高文虎氏倂取以編
於前例之後今本止有與夢得二帖而道原
十一帖無之殆後人以通鑑問疑別有專本
而削去不載歟其書雜出於南渡後恐不無
以意損益未必盡光本旨而相傳已久今故
與問疑並著於錄以備參考焉乾隆四十
一年五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

資治通鑑考異卷一

宋司馬光撰

周紀

安王二十五年魯穆公薨子共公奮立

司馬遷史記六國表周威烈王

十九年甲戌魯穆公元年列王元年丙午共公元年顯
王十七年己巳康公元年二十六年戊寅景公元年赧
王元年丁未平公元年二十年丙寅文公元年四十三
年己丑頃公元年五十九年乙巳周亡秦莊襄王元年
壬子楚滅魯按魯世家穆公三十三年卒若元甲戌終
己巳則是三十二年也共公一十二年卒若元丙午終

戊辰則是二十三年也康公九年卒景公二十五年卒
平公二十二年卒若元丁未終乙丑則是十九年也文
公二十三年卒頃公二十四年楚滅魯班固漢書律歷
志文公作緡公其在位之年與世家異者惟平公二十
年耳本志自魯僖公五年正月辛亥朔旦冬至推之至
成公十二年正月庚寅朔旦冬至定公七年正月己巳
朔旦冬至元公四年正月戊申朔旦冬至康公四年正
月丁亥朔旦冬至緡公二十二年正月丙寅朔旦冬至
漢高祖八年十一月乙巳朔旦冬至武帝元朔六年十
一月甲申朔旦冬至元帝初元二年十一月癸亥朔旦
冬至其間相距皆七十六年此最為得實又與魯世家
注皇甫謐所紀歲次皆合今從之六國表差謬難可盡
據也

顯王七年燕桓公薨子文公立

史記蘇秦傳謂之燕文侯按春秋時北燕簡公

已稱公文公之子易王尋稱王
豈文公獨稱侯乎今從世家

三十六年蘇秦約六國從

史記蘇秦傳秦兵不敢闚函谷關十五年又云其後秦使

犀首欺齊魏與其伐趙蘇秦去趙而從約皆解齊魏伐趙
趙敗從約止在明年耳其自相違戾如此秦本紀惠文
王七年公子卬與魏戰虜其將龍賈後二年事耳烏在
其不闚函谷十五年乎此出於遊談之士誇大蘇秦而
云爾今不取

慎觀王二年魏惠王薨子襄王立

史記魏世家云惠王三十六年卒子襄王

立襄王十六年卒子哀王立哀王二十三年卒子昭王
立六國表惠王元辛亥終丙戌襄王元丁亥終壬寅哀
王元癸卯終乙丑按杜預春秋後序云太康初汲縣有
發舊冢者大得古書其紀年篇起自夏殷周皆三代王

事無諸國別也。惟特記晉國起自殤叔，次文侯、昭侯，以至曲沃、莊伯，皆用夏正編年。相次晉國滅獨，記魏事下至魏哀王之二十年。蓋魏國之史記也。哀王於史記襄王之子惠王之孫也。古書紀年篇，惠王三十六年改元。從一年始至十六年，而稱惠成王卒。即惠王也。疑史記誤分惠成之世，以為後王年也。哀王二十三年乃卒，故特不稱謚。謂之今王。裴駰《魏世家》注引和嶠云：「紀年起自黃帝，終於魏之今王。」今王者，魏惠成王。子按：太史公書惠成王，但言惠王。惠王子曰襄王，襄王子曰哀王。惠王三十六年卒，襄王立十六年卒，并惠襄為五十二年。今按古文，惠成王立三十六年改元，稱一年改元後十七年卒。太史公書為誤分惠成之世，以為二王之年數也。世本：惠王生襄王，而無哀王。然則今王者，魏襄王也。彼既魏史所書，魏事必得其真。今從之。

報王五十七年，魏新垣衍說趙欲帝秦。魯仲連折之。
史記

魯仲連傳云新垣衍謝請出不敢復言帝秦秦將聞之
為却軍五十里按仲連所言不過論帝秦之利害耳使
新垣衍慙怍而去則有之秦將何預而退軍
五十里乎此亦遊談者之誇大也今不取

漢紀上

太祖元年十月沛公至霸上

史記漢書荀悅漢紀皆云是月五星聚東井按魏收

後魏書高允傳崔浩集諸術士考校漢元以來日月薄蝕五星行度并譏前史之失別為魏歷以示允允曰善言遠者必先驗於近且漢元年冬十月五星聚於東井此乃歷術之淺事今譏漢史而不覺此謬恐後之譏今猶今之譏古浩曰所謬云何允曰按星傳金水二星常附日而行冬十月日旦在尾箕昏沒於申南而東井方出於寅北二星何因背日而行是史官欲神其事不復推之於理浩曰欲為變者何所不可君獨不疑三星之

聚而怪二星之來允曰此不可以空言爭宜更審之時坐者咸怪東宮少傅游雅曰高君長於歷當不虛言也後歲餘浩謂允曰先所論者本不經心及更考究果如君語以前三月聚於東井非十月也今從之十月不言五星聚

三年酈生勸漢主據敖倉又請說齊王

史記漢書皆以食其勸取敖倉

及請說齊合為一事獨劉向新序分為二臣謂分為二者是

五年九月壬子立盧綰為燕王

史記漢書高紀於此皆云使丞相噲將兵平代

地按樊噲傳從平韓王信乃遷左丞相是時未為丞相又代地無反者噲傳亦無此事疑紀誤

十年五月太上皇崩七月癸卯葬

漢書五月太上皇后崩七月癸卯太上皇

崩葬萬年荀紀五月無后字七月無崩字蓋荀悅之時漢書本尚未訛謬故也今從之

徙周昌為趙相以趙堯為御史大夫

史記漢書張良傳皆云十二年上擊

黥布還愈欲易太子按百官表十年趙堯為御史大夫則是時太子位已定今從之

十一年二月丙午立皇子恢為梁王

漢書諸侯王表作三月丙午按劉義

叟長歷三月丙辰朔無丙午今從史記年表

七月立皇子長為淮南王

史記諸侯年表云十二月庚子厲王長元年漢書諸侯王

表十月庚午立今從漢書帝紀

上欲使太子擊黥布太子客使呂釋之夜見呂后

史記漢書

皆云呂澤夜見呂后按恩澤侯表有周呂侯澤建成侯
釋之今此上云建成侯而下云呂澤恐誤當為釋之是
又留侯世家上欲廢太子立戚夫人子趙王如意大臣
多諫爭未能得堅決者也呂后恐不知所為人或謂呂
后曰留侯善畫計策上信用之呂后乃使建成侯呂澤
劫留侯曰君常為上謀臣今上易太子君安得高枕而
卧乎留侯曰始上數在困急之中幸用臣策今天下安
定以愛欲易太子骨肉之間雖臣等百餘人何益呂澤
強要曰為我畫計留侯曰此難以口舌爭也顧上有不
能致者天下有四人四人者年老矣皆以為上慢侮人
故逃匿山中義不為漢臣然上高此四人今公誠能無
愛金玉璧帛令太子為書卑辭安車因使辯士固請宜
來來以為客時時從入朝令上見之則必異而問之問
之上知此四人賢則一助也於是呂后令呂澤使人奉
太子書卑辭厚禮迎此四人四人至客建成侯所上欲
使太子擊黥布四人相謂曰凡來者將以存太子太子

將兵事危矣乃說建成侯云云上遂自行上破布歸置酒太子侍四人從太子年皆八十有餘鬚眉皓白衣冠甚偉上怪問之曰彼何為者四人前對各言名姓曰東園公角里先生綺里季夏黃公上乃大驚曰吾求公數歲公辟逃我今公何自從吾兒游乎四人皆曰陛下輕士善罵臣等義不受辱故恐而亡匿竊聞太子為人仁孝恭敬愛士天下莫不延頸欲為太子死者故臣等來耳上曰煩公幸卒調護太子四人為壽已畢起去上目送之召戚夫人指示四人者曰我欲易之彼四人輔之羽翼已成難動矣呂氏真而主矣戚夫人泣上曰為我楚舞吾為若楚歌歌曰鴻鵠高飛一舉千里羽翮已就橫絕四海橫絕四海當可奈何雖有增繳尚安所施歌數闋戚夫人噓唏流涕上起去罷酒竟不易太子者留侯本招此四人之力也按高祖置猛伉厲非畏搢紳譏議者也但以大臣皆不肯從恐身後趙王不能獨立故不為耳若決意欲廢太子立如意不顧義理以留侯之

久故親信猶云非口舌所能爭豈山林四叟片言遽能
扼其事哉借使四叟實能扼其事不過汚高祖數寸之
刃耳何至悲歌云羽翮已成矰繳安施乎若四叟實能
制高祖使不敢廢太子是留侯為子立黨以制其父也
留侯豈為此哉此特辯士欲夸大四叟之事故云然亦
猶蘇秦約六國從秦兵不敢闕函谷關十五年魯仲連
折新垣衍秦將聞之却軍五十里耳凡此之類
皆非事實司馬遷好事多愛而采之今皆不取

十二年十一月陳豨反漢擊斬豨

盧綰傳云漢使樊噲擊斬豨按斬豨者周

勃非噲也

四月甲辰帝崩于長樂宮

漢書云呂后與審食其謀盡誅諸將酈商見審食其說以

如此大臣內畔諸將外反亡可躋足待也審食其入言之乃以丁未發喪按呂后雖暴戾亦安敢一旦盡誅大

臣又時陳平不在榮樊噲不在代此說恐妄今不取

惠帝三年季布曰前匈奴圍高帝於平城

季布傳云前陳豨反於代

時匈奴圍高帝於平城按平城之圍乃韓王信反非豨反也

高后元年大謁者張釋

史記文帝本紀及惠景間侯者表漢書匈奴傳皆作澤史記呂

后本紀八年中大謁者張釋漢書匈奴傳皆作澤史記呂及周勃傳皆云張釋顏師古注曰荆燕吳傳云張釋今

從史記呂后本紀漢書恩澤侯表周勃傳

酈侯台

漢書外戚侯表及高五王傳皆作酈侯今從史記本紀功臣侯表

二年十一月呂肅王台薨

史記本紀高后元年立孝惠子不疑為恒山王呂台為呂

王二年恒山王薨十一月呂王台薨年表二人皆以元年薨漢書本紀元年立不疑呂台產祿通為王二年不疑薨年表元年不疑及呂台為王二年皆薨蓋史記年表薨字應在二年誤書於元年耳其實二人皆以二年薨漢書本紀云產祿通為王亦誤也

五月封楚元王子郢客齊悼惠子章皆為侯史記高后紀在元年

今從漢書王侯表

六年夏張敖卒史記呂后本紀敖卒在明年六月按史記功臣表高后六年敖卒漢書功臣表

敖以高祖九年封十年薨蓋本紀之誤

七年七月封劉澤為琅邪王史記世家漢書列傳皆云田生先說張卿令風大臣

立呂產為呂王然後說令王澤按太后自以呂王嘉驕恣廢之以產代為呂王產非始封於呂又諸呂之王已久何必待田生之謀以此不取

八年四月封張侈為新都侯壽為樂昌侯

史記惠景間侯者表新都

作信都壽作受今從本紀

七月審食其為帝太傅

史記將相表八年七月辛巳食其為太傅九月丙戌復為丞相

後九月免漢書公卿表七年七月辛巳食其為太傅八年九月復為丞相後九月免以長歷推之八年七月無辛巳九月無丙戌閏月羣臣代邸上議無食其名二表皆誤今從史記本紀免相在此月本紀又云八月壬戌食其復為左丞相亦誤

八月齊王使祝午詐奪琅邪王澤兵

史記澤世家漢書傳皆以為澤與齊

王合謀皆誤今從史記呂后本紀齊王世家漢書呂后紀齊王傳

九月庚申旦

史記本紀八月庚申旦上有八月丙午漢書高后紀亦云八月庚申今以長厯推之

下八月當為九月

景帝三年周亞夫至洛陽喜曰滎陽以東無足憂者

史記

漢書皆云太尉得劇孟喜如得一敵國曰吳楚無足憂者按孟一游俠之士耳亞夫得之何足為輕重蓋其徒欲為益重名妄撰此言不足信也

中二年殺郅都

史記本紀後二年正月郅將軍擊匈奴酷吏傳郅都死後宗室多犯法上乃召

竇成為中尉成為中尉在中六年則後二年所謂
郅將軍者非都也疑別一人漢書紀無郅將軍事

世宗建元元年十月策賢良以董仲舒為江都相莊助

為中大夫

漢書武紀元光元年五月詔舉賢良董仲舒公孫弘出焉仲舒傳曰仲舒對策推明孔氏

抑黜百家立學校之官州郡舉茂才孝廉皆自仲舒發之今舉孝廉在元光元年十一月若對策在下五月則不得云自仲舒發之蓋武紀誤也然仲舒對策不知果在何時元光元年以前唯今年舉賢良見於紀三年閩越東甌相攻莊助已為中大夫故皆著之於此仲舒傳又云遼東高廟長陵高園災仲舒推說其意主父偃竊其書奏之仲舒由是得罪按二災在建元六年主父偃傳上書召見在元光元年蓋仲舒追述二災而作書或作書不上而偃後來方見其草藁也

二年石慶為太僕御出

按百官公卿表慶不為太僕蓋嘗攝職也

三年閩越圍東甌天子問田蚡

史記東越漢書嚴助傳皆云建元三年閩越圍

東甌天子問太尉田蚡按是時蚡不為太尉云太尉誤也下云太尉不足與計蓋追呼其官或亦誤耳

上招選天下之士得朱買臣等令與大臣論辯東方朔

諫起上林苑司馬相如諫獵

此多非今年事因莊助救東甌及微行始出終言之

元光二年王恢議誘擊匈奴

史記韓長孺傳元光元年聶壹畫馬邑事而漢書武

紀在二年蓋元年壹始言之二年議乃決也

三年春河水徙從頓丘東南流

漢書武紀云東南流入勃海按頓丘屬東郡勃

海乃在頓丘東北恐誤今不取

五月丙子復決瓠子注鉅野

史記河渠書元光中河決瓠子東注鉅野服虔注漢

書武紀曰瓠子隄名在東郡白馬蘇林曰在鄆城以南濮陽以北將相名臣表曰五月丙子河決瓠子然則瓠子即濮陽縣境隄名也

四年十二月晦殺竇嬰

班固漢武故事曰上召大臣議之羣臣多是竇嬰上亦不復窮

問兩罷之田蚡大恨欲自殺先與太后訣兄弟共號哭訴太后太后亦哭弗食上不得已遂乃殺嬰按漢武故事語多誕妄非班固書蓋後人為之託固名耳

三月乙卯丞相蚡薨

武安侯傳云元光四年春丞相按灌夫事其夏取夫人五年十月論

灌夫及家屬十二月晦魏其棄市徐廣引武帝本紀侯表以為蚡薨在嬰死後分明四年當是三年五年當是四年今從之廣又疑十二月為二月按漢制常以立春下寬大詔書蚡恐魏其得釋故以十二月晦殺之何必改為二月也

五年公孫弘對策一歲中至左內史

漢書武紀云元光元年五月詔策賢

良於是董仲舒公孫弘等出焉按弘傳元光五年復徵賢良文學菑川國推上弘其策文與武紀元年策文頗相類又云一歲中至左內史百官表元光五年弘為左內史然則弘之再舉賢良不在元光元年明矣荀紀著於此年徵吏民明當世之務下葛洪西京雜記亦云弘以元光五年為國士所推上為賢良若此續食之詔在八月則弘不容於今年已為左內史蓋此詔在今年不知何月故班氏繫之於年末耳其策文相類蓋出偶然

或者此策乃弘先舉賢良時所對班氏
誤以為此年之策疑未能明今從漢紀

董偃見上

漢武故事曰陳皇后廢處長門宮竇太主以
宿恩猶自親近後置酒主家主見所幸董偃

按東方朔傳爰叔為偃畫計令主獻長門園
更名曰長門宮則偃見上在陳后廢前明矣

元朔元年二月皇子據生

漢書武五子傳贊曰建元六
年春戾太子生外戚傳衛皇

后元朔元年生男據按枚臯傳云武帝春秋二十九乃
有皇子與外戚傳合蓋贊語因蚩尤之旗致此誤亦猶
五星聚在秦二世末年誤為漢元年也

秋韓安國病死

安國死在明年
於此終言之

東夷歲君南閭等降為蒼海郡

史記平準書曰彭吳賈
滅朝鮮置蒼海之郡按

滅朝鮮置蒼海兩事也
不知何者出賈之謀

主父偃嚴安徐樂上書

漢書主父偃傳云元光元年三人上書按嚴安書云徇南夷朝

夜郎降羌樊略葳州此等事皆在元光元年後蓋誤以朔字為光字耳

二年冬賜淮南王几杖毋朝

漢書武紀曰賜淮南王几杖毋朝顏師古曰

淮南王安菑川王志皆武帝諸父列也故賜几杖按諸侯表菑川王志在位三十五年以元光五年薨齊悼惠王世家高五王傳皆同此云菑川王志誤也

夏徙豪傑于茂陵族郭解

荀紀以郭解事著於建元二年按武紀建元二年初置茂

陵邑二年賜徙茂陵者錢當是時衛青公孫弘皆未貴又元朔二年徙郡國豪傑于茂陵此乃徙解之時也

三年張騫自匈奴逃歸

史記西南夷傳曰元狩元年張騫使大夏來言通身毒國之利

按年表騫以元朔六年三月甲辰封博望侯必非元狩元年始歸也或者元狩元年天子始令騫通身毒國疑不能明故因是歲伊穉斜立終言之

五年封丞相弘為平津侯

史記將相名臣表漢書公卿百官表弘為相皆在今年建

元以來侯者表恩澤侯表皆云元朔三年封侯按三年弘始為御史大夫蓋誤書五為三因置於三年耳

元狩二年三月戊寅丞相弘薨壬辰以李蔡為丞相張

湯為御史大夫

漢書百官公卿表元狩三年三月壬辰廷尉張湯為御史大夫六年有罪自殺

史記將相名臣表元狩二年御史大夫湯按李蔡既遷湯即應補其缺豈可留之暮年復與李蔡為丞相日月

正同乎又按長歷三年三月無壬辰又以
得罪之年推之在今年明矣今從史記表

渾邪王降發車二萬乘迎之

漢書食貨志云三萬兩今從史記平準書汲黯傳

三年得神馬於渥洼水中次以為歌汲黯進言上不說

史記樂書武帝作十九章歌常以正月上辛祠太一甘泉使僮男僮女七十人俱歌又嘗得神馬渥洼水中復次以為太一之歌後伐大宛得千里馬次以為歌中尉汲黯進曰陛下得馬詩以為歌云云丞相公孫弘曰黯誹謗聖制當族漢書禮樂志武帝定郊祀之禮祠太一於甘泉祭后土於汾陰乃立樂府作十九章之歌以正月上辛用事甘泉園丘按天馬歌本志云元狩三年馬生渥洼水中作武紀云元鼎四年秋馬生渥洼水中五年十一月立泰畤於甘泉太初四年貳師獲汗血馬作西極天馬之歌公孫弘以元狩二年薨汲黯以元狩三

年免右內史五年為淮陽太守元鼎五年卒又黜未嘗為中尉或者馬生渥洼水作歌在元狩三年汲黯為右內史而譏之言當族者非公孫弘也雖未立泰時或以歌之於郊廟其十九章之歌當時未能盡備也

四年少翁以方夜致鬼如王夫人之貌

漢書以此事置李夫人傳中古

今相承皆以為李夫人事史記封禪書少翁見上上有所幸王夫人卒少翁以方夜致王夫人及竈鬼之貌云按李夫人卒時少翁死已久漢書誤也今從史記

五年三月初行五銖錢

漢書食貨志前以銷半兩錢鑄三銖錢明年以三銖錢輕更鑄

五銖錢武帝元狩五年乃云罷半兩錢行五銖錢誤也

六年冬楊可告緡

漢書武紀元鼎三年十一月令民告緡據義縱傳則在今冬

義縱棄市霍去病射殺李敢

史記封禪書云明年天子病鼎湖甚病愈幸甘泉大

赦莫知其為何年本紀皆無其事獨義縱傳有之按漢書百官公卿表義縱李敢死者在今年敢傳云從上雍

至甘泉宮雍蓋衍字也平準書云自造白金五銖錢後五歲赦按武紀元狩四年造白金元鼎元年赦首尾四

年若今年更有赦則四年再赦與平準書不合今從百官表

顏異誅

徐廣注史記平準書云異誅在元狩四年壬戌歲廣見漢書百官公卿表其年注云太農令顏

異二年坐腹非誅不思有二年字致此誤也

元鼎元年

漢書武紀此年云得鼎汾水上漢紀云六月得寶鼎于河東汾水上吾丘壽王對云云按

封禪書樂大封樂通侯之歲其夏六月汾陰巫錦為民祠魏睢后土營旁得鼎詔曰間者巡祭后土云云武紀

元鼎四年十月幸汾陰十一月立后土祠于汾陰睢上
六月得寶鼎后土祠旁禮樂志又云元鼎五年得寶鼎
恩澤侯表元鼎四年四月乙巳樂大封侯然則得鼎應
在四年蓋武紀因今年改元而誤增此得鼎一事耳非
兩曾得鼎於汾水上也封禪書天子封太山反至甘泉
有司言寶鼎出為元鼎以今年為元封元年然則元鼎
年號亦如建元元光
皆後來追改之耳

四年樂成侯丁義薦樂大

漢書郊祀志作樂成侯登按
史記漢書功臣表當為丁義

樂大鬪旗

封禪書郊祀志皆作綦獨史記孝武紀作旗
按漢武故事云大嘗於殿前樹旂數百收大

令旂自相擊繡繡竟庭中去地十餘
丈觀者皆駭然則作旗字者是也

五年三月封樛廣德為龍亢侯

漢書功臣表作龍侯南
越傳作龔侯晉灼曰龔

古龍字史記建元以來侯者表
及南越傳皆作龍亢侯今從之

六年越郎都稽得呂嘉

史記漢書表皆作孫都南
越傳皆云都稽今從傳

封樓船蘇弘都稽趙光等皆為侯

凡此等封侯者年表
皆有月日為其先後

難齊故盡附於立
功之處後放此

分武威酒泉置張掖敦煌郡

漢書武紀元狩二年渾邪
王降以其地為武威酒泉

郡元鼎六年分置張掖敦煌郡而地理志云張掖酒泉
郡太初元年開武威郡太初四年開敦煌郡後元元年

分酒泉置
今從武紀

元封元年冬釋兵須如

漢書作涼如
今從史記

上問黃帝冢公孫卿對

史記漢書皆云或對漢武故事云公孫卿對今取之

正月幸緱氏

封禪書郊祀志作三月漢書武紀及荀紀皆作正月今從之

四月乙卯封泰山下東方

武紀癸卯上還登封泰山蓋癸卯自海上還乙卯至泰山

行市也

二年公孫遂往正之

史記作征之蓋字誤今從漢書

天子誅遂

漢書作許遂按左將軍亦以爭功相嫉乖計棄市則武帝必以遂執樓船為非漢書作許

蓋字誤今從史記

相韓陰

漢書陰作陶今從史記

三年七月膠西王端薨

荀紀端皆作瑞今從漢書

五年四月衛青薨

漢武故事云大將軍四子皆不才皇后每因太子涕泣請上削其封上曰

吾自知之不令皇后憂也少子竟坐奢淫誅上遣謝后通削諸子封爵各留千戶焉按青四子無坐奢淫誅者此說妄也

天漢元年衛律使匈奴還聞李延年家收亡降匈奴

延年

傳云誅延年兄弟宗族按是後李廣利尚為將帥蓋止誅延年及弟季妻子耳

七月閉城門大搜

臣瓚注武帝紀曰漢帝年記六月禁踰侈七月大搜則搜索踰侈者不必

閉城門大搜蓋搜姦人耳

四年正月遣李廣利等擊匈奴

史記匈奴傳云廣利於此降匈奴誤

四月立皇子臯為昌邑王

表云六月乙丑立今從武紀

征和二年七月壺關三老茂上書天子感悟

漢武故事云治隨太

子反者外連郡國數十萬人壺關三老鄭茂上書上感寤赦反者拜鄭茂為宣慈校尉持節徇三輔赦太子太子欲出疑弗實吏捕太子急太子自殺按上若赦太子當詔吏勿捕此說恐妄也

四年八月辛酉晦日有食之

荀紀作七月漢書作八月按長歷是年九月壬戌朔

言八月是也

後元元年六月商丘成坐祝詛自殺

功臣表云坐為詹事祠孝文廟醉歌

堂下曰出居安能鬱鬱大不敬自殺公卿表云坐祝詛按成不為詹事功臣表誤也

昭帝始元四年以上官安為車騎將軍

昭紀作驃騎今從百官表外戚

傳

五年成方遂自謂衛太子

昭紀云張延年雋不疑傳云成方遂又云一姓張名延年

今從不疑傳

元鳳四年樓蘭王安歸

西域傳作常歸今從昭紀及傳介子傳

元平元年昌邑王嘗見大白犬頸以下似人冠方山冠

而無尾

昌邑王傳云無頸五行志云無尾且云不得置後之象若頸以下似人而無頸何以辨其為犬

且安所施冠
蓋傳誤也

中宗本始三年遣五將軍及烏孫擊匈奴獲四萬級馬

牛羊驢橐駝七十餘萬頭

常惠傳四萬級為三萬九千人七十餘萬頭為六十餘萬

頭今從
烏孫傳

六月己丑蔡義薨

荀紀作
乙丑誤

地節二年四月戊申以張安世為大司馬車騎將軍官百

表地節三年四月戊申張安世為大司馬七月戊戌更為衛將軍霍禹為大司馬七月壬辰禹要斬荀紀三年四月戊辰安世為大司馬按明年四月無戊辰七月無戊戌又不當再言七月以宣紀張安世霍光傳考之安

世為司馬當在今年為衛將軍當在明年十月禹
死在四年七月蓋年表旁行通連書之致此誤也

三年四月戊申立子奭為皇太子

荀紀立皇太子在去
年四月戊申漢書舊

本亦然顏師古據疏廣及邴吉傳並云
地節三年立皇太子知在此年者是也

鄭吉與司馬憲擊車師

西域傳云地節二年以
匈奴傳校之知在三年

元康元年冬趙廣漢坐要斬

本紀元康二年冬廣漢有
罪要斬百官表本始三年

廣漢為京兆尹六年要斬元康元年守京兆尹彭城太
守遺按廣漢傳司直蕭望之劾奏廣漢推辱大臣望之
自司直為平原太守元康元年自平原太守為少府然
則廣漢死當在元康元年本紀誤也廣漢傳又云地節
三年七月丞相婢自殺死蓋婢
死已數年而廣漢追發其事也

三年三月封故昌邑王賀為海昏侯

王子侯表賀以四月壬子封宣紀賀

封在丙吉之前按是歲四月癸亥朔無壬子表誤

四年八月求高祖功臣子孫皆復其家

宣紀元康元年五月復高皇帝

功臣絳侯周勃等百三十六人家子孫四年又賜功臣適後黃金人二十斤按功臣表詔復家者皆云元康四年其數非一不容盡誤蓋紀誤耳

神爵二年五月趙充國奏罷屯兵秋羌斬先零猶非楊

玉首降

宣紀五月羌斬猶非楊玉降充國傳五月奏罷屯兵秋羌斬猶非楊玉降今從傳

置都護自鄭吉始

百官表曰西城都護加官地節二年初置蓋誤以神爵為地節也西域傳

又云神爵

三年亦誤

大鴻臚蕭望之議不可許烏孫結昏

烏孫傳請昏在元康二年望之傳云

神爵二年按元康二年望之未為鴻臚蓋誤以神爵為元康也

三年八月詔益吏百石已下俸十五

宣紀云益吏百石以下俸十五韋昭

曰若食一斛則益五斗荀紀云益吏百石以下俸五十斛蓋以十五難曉故改之然詔云以下恐難指五十斛也

四年五月匈奴單于遣弟呼留若王勝之來朝

匈奴傳握衍朐

鞬單于立復修和親遣弟伊酋若王勝之入漢獻見蓋即謂此也

五鳳元年春皇太子冠

按宣紀太子冠在此年而荀紀於元康三年敘二疏去位事已

云皇太子冠至是又重復言之蓋誤也

二年正月幸甘泉郊泰時

宣紀云三月行幸甘泉荀紀作正月按漢制常以正月郊

祀蓋荀悅作紀之時本猶未誤也又楊惲傳曰行必不至河東矣蓋時亦幸河東祠后土史脫之也

十一月匈奴烏厲屈與父呼遼累烏厲溫敦降封烏厲

屈為新城侯烏厲溫敦為義陽侯

宣紀匈奴呼遼累單于帥眾來降功臣表

信城侯王定以匈奴烏桓屠薦單于子左大將軍率眾降侯義陽侯厲溫敦以匈奴諱連累單于率眾降侯此即屈與敦也未嘗為單于或降時自稱單于或紀表二者誤也

楊惲戴長樂皆免為庶人

宣紀十二月楊惲坐前為光祿勳有罪免為庶人不悔過

怨望大逆不道要斬荀紀因而用之惲傳惲與孫會宗書曰臣之得罪已三年矣又因日食之變駟馬猥佐成上書告惲罪下獄死又楊譚稱杜延年為御史大夫按百官表惲以神爵元年為光祿勳五年免戴長樂亦以其年為太僕五年免杜延年以五鳳三年六月辛酉為御史大夫又按蕭望之傳使光祿勳惲策免望之其事在今年八月惲猶為光祿勳至四年四月乃有日蝕之變蓋惲以今年十二月免為庶人至四年乃死宣紀誤也

三年六月辛酉杜延年為御史大夫

荀紀作辛巳百官表作辛酉按長歷

此月丙午朔無辛巳

四年匈奴單于遣弟谷蠡王入侍

按匈奴傳呼韓邪稱臣即遣銖婁渠堂入

侍事在明年時匈奴有三單于不知此單于為誰也

甘露元年張敞免為庶人數月拜冀州刺史

荀紀載於五鳳二年

因楊惲事并致此誤也百官表敞以神爵元年為京兆尹八年免敞傳云為京兆九歲免

二年春正月立皇子囂為定陶王

諸侯王表云十月乙亥立今據宣紀

四年夏廣川王海陽

諸侯王表作汝陽宣紀景十三王傳作海陽今從之

元帝初元二年二月丁巳立弟竟為清河王

荀紀竟作寬今從漢

書

戊午隴西地震敗城郭屋室壓殺人衆

劉向傳云三月地大震今從元

紀

四月詔賜蕭望之爵關內侯

元紀此詔在今冬按劉向傳云前弘恭奏望之等獄

決三月地大震然則望之等黜免在今春地震前也又曰夏客星見昴卷舌間上感悟下詔賜望之爵關內侯望之傳曰後數月賜望之爵關內侯蓋紀見望之死在十二月因置此詔於彼上耳

七月己酉地復震

劉向傳曰冬地復震元紀此月詔曰一年中地再動漢紀在七月己酉今

從之

五年六月匈奴郅支單于殺谷吉

陳湯傳初元四年郅支求侍子元帝紀五

年谷吉使匈奴不還湯傳又云御史大夫貢禹議吉不可遣按禹今年六月始為御史大夫或者郵支以四年求侍子而吉以五年使匈奴也

永光元年九月于定國史高薛廣德皆罷韋玄成為御

史大夫

百官表七月癸未大司馬高免辛亥韋玄成為御史大夫十一月戊寅丞相定國免荀紀七月

已未高免薛廣德傳耐祭後月餘以歲惡民流乞骸骨罷廣德為御史大夫凡十月免月日參差未知孰是故皆沒不書

賈捐之謂楊興曰使我得見言君蘭

荀紀作君簡今從漢書

建昭二年六月立皇子興為信都王

荀紀興作譽今從漢書

京房言於上曰陛下視今為治邪亂邪所任者誰與資故

政殿學士邵亢得兩浙錢王寫本漢書無亂邪二字有上曰亦極亂耳尚何道房曰今十二字今取之

京房棄市

元紀及荀紀京房死皆在此年末按房傳二月朔上封事去月餘徵下獄百官表八月癸

亥匡衡為御史大夫房死必不在歲末也紀不知月日故繫之歲末耳

成帝河平元年匈奴單于遣右臯林王伊邪莫演等朝

正月

匈奴傳河平元年單于遣莫演朝正月下云明年單于上書願朝河平四年正月遂入朝據此則是

莫演以元年至漢朝二年正月也而荀紀繫於元年正月之下恐誤漢紀又以莫演為黃渾今從漢書

二年夜郎與鉤町相攻陳立討誅之

西南夷傳但云河平中而胡旦漢春

秋云在此年十一月未知何據也

鴻嘉三年上微行過陽阿主家

五行志作河陽主伶玄趙后外傳及荀紀亦作

河陽外戚傳顏師古注曰陽阿平原之縣也今俗書阿字作河又或為河陽皆後人所妄改耳今從之

永始元年春正月癸丑太官凌室火戊午戾后園南闕

火五行志及荀紀二火皆作災今從漢書

劉輔上書曰腐木不可以為柱人婢不可以為主

劉輔傳云

腐木不可以為柱卑人不可以為主荀紀柱作珪卑人作人婢今柱從漢書人婢從荀紀

七月癸卯封蕭何六世孫喜為鄼侯

成紀元延元年封蕭相國後喜為鄼

侯荀胡皆用之按功臣表永始元年釐侯喜紹封三年
薨永始四年質侯尊嗣五年薨綏和元年質侯章嗣蓋
本紀誤以永始
為元延故也

立城陽哀王弟惲為王

漢紀惲作悝
今從漢書

九月丁巳晦日有食之

荀紀作乙巳按長
歷丁巳晦荀悅誤

二年上諸舅風丞相御史免張放

敘傳云王音以風丞
相御史按放傳丞相

宣御史大夫方進奏放過惡音以正月乙巳薨方進以
三月丁酉為御史大夫然則風丞相御史者疑非音也
放傳又云上諸舅皆害
其寵故但云上諸舅

十一月己丑丞相宣免御史大夫方進貶壬子方進為

丞相

方進傳薛宣免方進亦左遷執金吾二十餘日遂擢為丞相而荀紀云秋八月方進貶為執金吾蓋

以公卿表云三月丁酉京兆尹翟方進為御史大夫八月貶為執金吾故致此誤也按公卿表所云者謂方進自三月為御史大夫至十一月而貶凡居官八月耳又黑龍見東萊在去年九月谷永傳著之甚明而荀悅亦載之於此年云冬黑龍見東萊蓋因陳湯獲罪在今年故也漢春秋雖正黑龍之誤而方進貶官猶承荀悅之失

陳湯徙邊陳咸逢信免官

咸信免官皆在明年以後因陳湯事連言之

三年十一月李譚等殺樊並皆封侯

本紀云五人而功臣表止有四入蓋

紀誤

元延元年劉向上書

向傳云星孛東井岷山崩向懷不能已上此奏按岷山崩在三年此

奏云自建始以來二十歲間而食八率二歲六月而一發則上此奏當在今年也胡旦亦載之二年

十二月乙未王商為大將軍辛亥商薨庚申王根為大

司馬

荀紀云十一月成紀云十二月按是歲十一月甲子朔無乙未辛亥庚申荀悅誤

揚雄待詔

雄傳云車騎將軍王音奇其文雅薦雄待詔按雄自序云上方郊祠甘泉泰畤召雄待詔

承明之庭奏甘泉賦其十二月奏羽獵賦事在今年時王音卒已久蓋王根也胡旦遂誤以為曲陽侯云

二年四月立廣陵孝王子守為王

荀紀守作憲今從漢書

立烏孫小昆彌安日弟末振將為小昆彌

烏孫傳以來振將為安日

弟段會宗傳以
為凡兄字誤耳

三年上令胡人搏禽獸

成紀元延二年冬行幸長楊宮從胡客大校獵宿黃陽宮賜從

官胡旦用之按揚雄傳祀甘泉河東之歲十二月羽獵雄上校獵賦明年從至射熊館還上長楊賦然則從胡客校獵當在今年紀因去年冬有羽獵事致此誤耳

綏和二年二月

荀紀云赦天下今本紀無之故不取

四月己卯葬孝成皇帝于延陵

成紀三月丙戌帝崩于未央宮四月己卯葬延

陵臣瓚曰自崩至葬凡五十四日漢紀三月丙午帝崩四月己卯葬延陵自崩及葬三十四日按是年三月己巳朔無丙午四月己亥朔無己卯若依成紀則當云五月乙卯葬依荀紀則當云閏三月丙午崩二者各有差

舛未知孰是按是年閏七月不當頓差四月今且從成紀之文

七月丁卯王莽罷就第

公卿表十一月丁卯大司馬莽免庚午師丹為大司馬四月徙

又曰十月癸酉丹為大司空又曰太子太傅師丹為左將軍五月遷荀紀七月丁巳大司馬莽免按丹若以十一月為司馬四月徙官不得以十月為司空也七月丁卯朔無丁巳年表月誤荀紀日誤

九月庚申地震上問李尋

尋傳云使侍中衛尉傅喜問尋按公卿表傅喜為衛尉二

月遷右將軍十一月罷地震在九月當是時喜已不為衛尉

資治通鑑考異卷一

欽定四庫全書

資治通鑑考異卷二

宋 司馬光 撰

漢紀中

哀帝建平元年正月解光奏趙昭儀殺成帝子皆在四

月丙辰赦令前

趙后傳作丙辰按哀帝紀四月丙午即位赦天下蓋傳誤也或者即位十日然

後赦

丁酉傳喜為大司馬

公卿表綏和二年十一月庚午師丹為大司馬四月徙建平元年四

月丁酉傳喜為大司馬喜傳云明年正月徙師丹為大司空而拜喜為大司馬荀紀亦在正月按長歷此年四

月癸亥朔無丁酉

今從喜傳漢紀

二年四月戊午朱博為御史大夫乙亥丞相孔光免博

為丞相

公卿表四月乙未孔光免朱博為丞相又曰四月戊午博為御史大夫乙亥遷五行志四月乙

亥朔博為丞相荀紀乙亥孔光免按長歷是月丁巳朔無乙未十九日乙亥非朔也表志皆有誤

三年正月癸卯桂宮正殿火

五行志云桂宮鴻寧殿災荀紀云桂宮正殿火今從

紀

四年二月癸卯封博商為汝昌侯

哀紀及恩澤侯表皆云商以今年二月封

而孫寶傳云制詔丞相大司空按建平二年已罷大司空官疑傳誤

元壽元年正月辛丑朔

荀紀云辛卯朔誤

十二月王閎諫上云欲禪董賢

董賢傳但云遣閎出不得復侍宴自歸郎署以

下皆漢紀所載也荀紀無漢書外事不知此語荀悅何從得之又云閎歸郎署二十日長樂宮深為閎謝又御史大夫彭宣上封事言國安危繼嗣事上覺寤召閎按太皇太后居長信宮云長樂宮誤也

八月廢孝成皇后孝哀皇后為庶人是日皆自殺

漢春秋云

八月甲寅未
知胡旦所據

十月壬寅葬孝哀皇帝於義陵

哀紀云九月壬寅葬義陵按長歷是月辛酉朔

無壬寅壬寅乃十月十二日又臣瓚注曰自崩至葬凡百五日按帝以六月戊午崩然則葬在十月審矣蓋本紀月誤也

平帝元始元年二月丙辰褒賞孔光王舜等

平紀作正月事而王

子侯表公卿表皆云二月丙辰今從之

封宣帝耳孫信等三十六人為列侯

平紀元始元年封孝宣曾孫信等三

十六人莽傳在五年按王子侯表皆以元年二月丙辰封莽傳誤也

四年二月丁未立皇后王氏

王莽傳云四月丁未平紀云二月丁未立皇后王氏

下云夏皇后見于高廟外戚傳云明年春迎皇后於安漢公第然則言四月者誤也

冬置西海郡

王莽傳置西海郡在明年秋今從平紀

五年閏五月丁酉封劉秀等為列侯

恩澤侯表劉歆等十一侯皆云丁酉

獨平晏云丁丑按十二人同功俱封是年閏五月甲午朔無丁丑表誤

冷褒段熲等徙合浦

師丹傳云復免高昌侯宏為庶人按功臣表建平四年董宏已死元

壽二年子武坐父為佞邪免不得至今丹傳誤也

封師丹為義陽侯

恩澤侯表丹元始三年二月癸巳更為義陽侯胡旦因此并發傳太后陵

徙冷褒等事俱著之三年按外戚傳云元始五年莽發共王母及丁姬冢改葬之馬宮傳莽發傳太后陵追誅前議者宮慙懼乃乞骸骨公卿表宮以今年八月壬午免然則褒等徙合浦及丹封侯皆在今年明矣按長歷

二月丙申朔無癸巳日月必有誤者

王莽始初元年

莽傳作初始荀紀及韋莊美嘉號錄宋庠紀年通譜皆作始初今從之

始建國元年正月漢諸侯王皆降爵為公王子侯者降

爵為子後皆奪爵

諸侯王表皆云莽篡位貶為公明年廢王子侯表但云絕或云免皆在今

年按明年立國將軍建奏諸劉為諸侯者以戶多少就五等之差亦不云奪爵也後漢城陽王祉傳云劉氏侯者皆降為子後奪爵不知奪在幾年

二年匈奴號良帶曰烏賁都尉

匈奴傳云烏桓都將軍西域傳云烏賁都尉今

從之

率禮侯劉嘉

燕王旦傳廣陽王嘉封扶美侯莽傳云率禮侯劉嘉未知其改封或別一人也今從

莽傳

四年牂柯大尹周歆

西南夷傳作周欽莽傳作周歆今從之

天鳳元年改作貨布

食貨志改作貨布在天鳳元年蓋以大錢盡之年

至地皇元年乃絕不行耳非其年始作貨布也

淮陽王更始元年張卬拔劔擊地

司馬彪續漢書卬作印袁宏後漢紀作斤

皆誤今從范曄後漢書

安定大尹王向

王莽傳作卒正王旬袁紀作太守王向今從范書

前鍾武侯劉望

王莽傳作劉聖今從范書劉玄傳

國將哀章

袁紀作褒章今從班范書

二年邳彤曰邯鄲勢成民不肯背成主而千里送公

范書邳彤傳邯鄲成民不肯背成主字皆作城袁紀作邯鄲和城民不肯捐棄和城而千里送公漢春秋作邯鄲之民不能捐父母背成主按文意城皆當作成邯鄲成謂邯鄲勢成也成主謂王郎為已成之主也

刁子都

范書作力子都同編修劉歆曰力當作刁音彫

大司馬曰何意二郡良為吾來

袁紀作良牧為吾來今從景丹傳

宛人朱祐

范書表紀朱祐皆作祐按東觀記祐皆作福避安帝諱許慎說文祐字無解云上諱然則

祐名當從示旁古今之古不當作左右之右也

拜寇恂河內太守

表紀鄧禹初見王於鄴即言欲據河內至是又云更始武陰王李軼據洛

陽尚書謝躬據鄴各十餘萬衆王患焉將取河內以迫之謂鄧禹曰卿言吾之有河內猶高祖之有關中關中非蕭何誰能一方晏然高祖無西顧之憂吳漢之能卿舉之矣復為吾舉蕭何禹曰寇恂才兼文武有御衆才非恂莫可安河內也按世祖既貳更始先得河內魏郡因欲守之以比關中非本心造謀即欲指取河內也今依范書為定

世祖建武元年六月己未即皇帝位

光武本紀馮異破蘇茂諸將上尊號

光武還至薊皆在四月前而馮異傳異與李軼書云長安壞亂赤眉臨郊王侯搆難大臣乖離綱紀已絕又勸光武稱尊號亦曰三王反叛更始敗亡按是年六月已未光武即位是月甲子鄧禹破王匡等於安邑王匡張卬等還奔長安乃謀以立秋軀腰時共劫更始然則三王反叛應在光武即位之後夏秋之交馮異安得於四月之前已言之也或者史家潤色其言致此差舛耳

王匡等奔還長安

劉玄傳王匡張卬守河東為鄧禹所破奔還長安鄧禹傳無張卬名今從

之

張卬等說更始掠長安東歸不從謀劫更始袁紀云申屠建等勸

更始讓帝位更始不應建等謀劫之今從范書

十月鄧禹引軍至栒邑

袁紀禹曰璽書每至輒曰無與窮赤眉爭鋒按世祖賜禹書責

其不攻長安不容有此語二年十一月詔徵禹還乃曰毋與窮寇爭鋒袁紀誤也

十一月隗囂擊破馮愔

鄧禹傳愔叛在建武元年隗囂傳在二年蓋愔以元年冬末叛

延及二年囂拜官在二年也

二年正月起高廟于洛陽

帝紀正月壬子按正月甲子朔不應有壬子誤

二月鮑永馮衍降

鮑永傳稱永等降於河內時攻懷未拔帝謂永曰我攻懷三日而兵不下

關東畏服卿可且將故人自往城下譬之即拜永諫議大夫至懷乃說更始河內太守於是開城而降按光武未都洛陽以前屢幸懷又祠高祖於懷宮並無更始河內太守據懷事本紀亦無攻懷一節按田邑書稱主亡

卷二
一歲莫知定所則永衍之降必在此年而帝紀光武此
年不曾幸河內但有幸脩武事然則永衍實降於脩武
脩武亦河內縣也其稱降懷
等事當是史誤故皆略之

九月鄧禹斬李寶

更始柱功侯李寶時為劉
嘉相此蓋別一人同姓名

三年三月朱浮遁走城降彭寵

朱浮傳尚書令侯霸奏
浮敗亂幽州構成寵罪

徒勞軍師不能死節罪當伏誅按
霸明年乃為尚書令蓋追劾之

四年七月丁亥幸譙

袁紀六月幸
譙今從范書

馮異破李育程焉

公孫述傳使李育程焉與呂鮪徇三
輔三年馮異擊鮪育於陳倉大敗之

按本紀四年馮異與述將程焉戰陳倉破之馮異
傳亦在今年蓋述傳誤以四年為三年焉作焉耳

五年正月使來歙送馬援歸隴右

袁紀曰援與拒蜀侯國遊先俱奉使

遊先至長安為仇家所殺其弟為囂雲旗將軍來歙恐其怨恨與援俱還長安按囂使被殺者周遊也不

在此時

三月龐萌襲破蓋延

東觀記續漢書皆云萌攻延延與戰破之詔書勞延曰龐萌一夜反

畔相去不遠營壁不堅殆令人齒欲相擊而將軍有不

可動之節吾甚美之延傳言僅而得免與彼不同今從

楚郡太守孫萌

袁紀作楚相孫萌今從范書

十月張步大將軍費邑

袁紀作濟南王費邑今從耿弇傳

六年春申屠剛自隗囂所來

本傳云七年徵剛按明年囂已臣公孫述必不用詔

書當在此年

七年八月隗囂侵安定馮異拒之囂別將攻祭遵

帝紀六年

冬隗囂將行巡寇扶風馮異拒破之馮異傳六年夏諸將上隴為隗囂所敗乃詔異軍拘邑未及至囂乘勝使王元行巡將二萬人下隴分遣巡取拘邑異即先據拘邑破巡又云祭遵亦破王元於汧隗囂傳侵三輔事亦同按此文勢緣諸將才敗還隗囂即遣二將追之故得云乘勝又云馮異未及至拘邑也然則馮異祭遵之破王元行巡實在六年明矣至七年八月紀又有隗囂寇安定馮異祭遵擊却之此即隗囂傳所書秋囂侵安定至陰槃馮異拒之又令別將攻祭遵於汧兵並無利者也據此是囂兩歲各嘗攻馮異祭遵矣故遵傳亦云數

挫隗囂也而袁紀不載六年事併在七年秋紀之且傳云囂乘勝若事已一年安可云乘勝又馮異何緣稽緩爾久不至拘邑故知袁紀誤矣

八年十二月溫序伏劍而死

按序傳及袁紀皆稱序為護羌校尉檢西羌傳九年

方置此官牛邯為之又云邯卒職省則序無緣作護羌今但云校尉

十一年三月己酉幸南陽

帝紀己酉幸南陽庚午車駕還宮上有二月己卯袁紀三

月己酉幸南陽以長厯考之二月壬申朔己卯八日也己酉庚午皆在三月蓋帝紀己酉上脫三月字今從袁紀

十二年任延曰忠臣不和和臣不忠

延傳作忠臣不私私臣不忠按高峻

小史作忠臣不和和臣不忠意
思為長又與上語相應今從之

十七年二月乙未晦日有食之

帝紀乙亥晦袁紀乙未
據長歷三月丙申朔帝

紀誤

十九年四月馬援擊都陽等嶠南悉平

援傳作都羊帝
紀作都陽今從

紀又帝紀十八年四月遣援擊交趾十九年四月斬側
貳等因擊都陽等降之援傳十七年拜伏波將軍討側
貳十八年春軍至浪泊明年正月斬側貳蓋紀之所書
者援奏破側貳及傳側貳首至雒之時也沈懷遠南越
志云徵側奔入金溪穴中二
年乃得之援傳近是今從之

二十一年八月伏波將軍馬援築堡塞擊烏桓

劉昭注
補後漢

書志亦謂之續漢志其郡國志注云中郎將馬援誤也
帝紀冬十月遣援出塞擊烏桓援傳十二月出屯襄國
明年秋將三千騎出高柳袁
紀在八月祭彤事前今從之

二十二年匈奴單于蒲奴求和親遣李茂報命帝紀是歲匈奴

日逐王比遣使詣漁陽請和親使茂報命按明年又有
比遣使詣西河內附然則茂所報者非比也今從南匈
傳奴

二十五年烏桓內屬帝紀今春既著烏桓來朝歲末又紀是歲烏桓朝貢內屬蓋始獨大

人來朝後乃率
種族內屬耳

二十六年秋賜南單于璽綬帝紀今年春使段柳賜璽綬置使匈奴中郎將據匈奴

奴傳賜璽綬在秋其置中郎將亦未知決在何時或者令春置之至是更為之約束制度耳

二十七年樊宏薨

袁紀宏皆作密令從范書

三十年十一月賈復薨

本傳在三十一年今從袁紀

中元元年四月改元

續漢志云以建武三十二年為建武中元元年紀年通譜云據紀志俱

出范氏而所載不同此必傳寫脫誤今官書累經校定學者失於精密但見改元復有建武二字輒以意刪去斯為謬矣梁武帝大同大通之號俱有中元是亦憲章於此今從袁紀范書

顯宗永平二年十月賜桓榮爵關內侯

帝紀載詔文上言李躬而下獨

封榮似脫躬字榮傳袁紀詔獨言桓榮不及李躬今闕疑

十四年春周澤行司徒事復為太常

澤傳云十二年按十二年不闕司徒

當是虞延免後邢穆未至間澤行司徒事爾故云數月

寒朗

范書作寒陸龜蒙離合詩云初寒朗詠徘徊立表紀作寒按今有寒姓音件與表紀合今從之

十六年吳棠下獄免

表紀棠皆作常今從范書

十七年正月謁原陵降甘露於陵樹

帝紀云甘露降甘陵皇后紀云謁原

陵甘露降於樹然則實降原陵也帝紀誤以原為甘

班超立疏勒故王兄子忠為王

表紀云求索故王近屬得兄揄勒立之更名忠

續漢書云求得故王兄子揄勒立之更名忠今從超傳

陳睦為西域都護

袁紀睦作穆
今從范書

柳中城

袁紀作折中
今從范書

十八年酒泉太守段彭

耿恭傳云秦
彭今從帝紀

肅宗建初三年春馬防大破羌於布橋

帝紀防破羌在
四月蓋春破而

京師四月始聞
也今從防傳

四年四月癸卯封馬廖等為侯

皇后紀稱廖等並辭讓
願就關內侯太后聞之

云云廖等不得已受封爵按太后之辭皆不欲封廖等
之意而史家文勢反似太后欲令廖等受封今輒移廖
等辭讓於太后語下使
文勢有序讀者易解

七年十二月東平獻王

范書作憲
今從袁紀

元和元年褒寵毛義鄭均

義傳云建初
中今從均傳

二年太初歷失天益遠作四分歷

按王莽初已廢太初
用三統歷今云太初

歷失天益遠蓋光武中興廢莽歷復用太初也續漢志
又云自太初元年始用三統歷按三統歷劉歆所造云

太初元年
始用誤也

三年四月鄭弘上書言竇憲

袁紀云弘為尚書僕射烏
孫王遣子入侍上問弘當

答其使不弘對曰烏孫前為大單于所攻陛下使小單
于往救之尚未賞今如答之小單于不當怨乎上以弘
議問侍中竇憲對曰禮有往來弘章句諸生不達國禮
上遂答烏孫小單于忿恚攻金城郡殺太守任昌上謂

弘曰朕前不從君議果如此弘對曰竇憲姦臣也有少正邪之行未被兩觀之誅陛下前何為用其議按肅宗時無小單于寇金城事今不取

章和二年正月何敞奏記宋由

敞傳此事在肅宗崩後云竇氏專政外戚奢侈

賞賜過制敞奏記云云袁紀在元和三年按敞記云明公視事出入再朞又言臘賜知在此時

七月南單于請伐北虜

袁紀章和元年十月南單于上書求出兵破北成南宗意諫不

聽師未出而帝寢疾范書南匈奴傳事並在此年七月按單于書云孝章皇帝聖恩遠慮則范書是也今從之

都鄉侯暢

袁紀作郁鄉今從范書

冬鄧訓破迷唐

西羌傳永元元年張紆坐徵以訓代為校尉鄧訓傳章和二年紆誘誅羌謀

報怨公卿舉訓代紆擊破之其春迷唐復欲歸訓又破之按訓傳下云永元二年則其春者永元元年春也今從訓傳

和帝永元二年五月副校尉閭韞

西域傳作閭韞今從帝紀

三年十二月竇憲請立於除鞬為單于宋由等以為可

許袁安獨上封事上竟從憲策

袁安傳云憲請立左鹿蠡王阿脩為北單于安

以為不可憲竟立右鹿蠡王於除鞬據此則阿佟與於除鞬是二人袁紀作阿脩南匈奴傳止有右谷蠡王於除鞬無阿佟名今從之袁紀又云宋由丁鴻尹睦以為阿脩誅君之子又與烏丸鮮卑為父兄之讐不可立南單于先帝所置今首破北虜新建大功宜令并領降衆與范書不同又云卒從安議蓋誤今從袁安傳

六年正月骨都侯喜殺南單于安國

帝紀在去年誤今從南匈奴傳

七月班超斬尉犂王汎

袁紀汎作況今從超傳

九年閏八月樊調妻嬖

袁紀嬖皆作憑今從皇后紀梁竦傳

越騎校尉趙世

西羌傳作趙代今從帝紀

十四年八月班超至洛陽九月卒

本傳稱超十二年上疏十四年至洛陽而

妹昭上書曰延頸踰望三年於今注引東觀記曰安息

遣使獻大雀師子超遣子勇隨入塞按帝紀十三年安

息國入貢袁紀載超書亦在十三年今并置

其書於此袁紀又云超到數月薨今從本傳

安帝永初元年三月甲申葬清河孝王司空宗正護喪

事帝紀書車騎將軍護葬今從傳

封鄧閭為列侯袁紀前作閭後作闔蓋誤

十二月詔鄧騭任尚屯漢陽帝紀在六月今從西羌傳

三年六月烏桓寇代郡上谷紀有涿郡傳無之今從傳

四年鄧騭欲弃涼州虞詡言於張禹以為不可龐參虞詡傳皆

云四年羌轉盛故有棄涼州之畫又于說鄧騭則是騭未以喪罷以前明矣而虞詡傳中言詡辟太尉李膺府為郎中說李膺以五年正月方自光祿勳拜太尉按袁紀四年春匈奴寇常山下載騭欲棄涼州詡說太尉張禹又其語言小異於范書此近得實今從之

五年三月詔隴西徙襄武

上云金城徙襄武此又云隴西徙襄武紀傳皆然或者二

郡皆寄治於襄武歟

元初元年二月乙卯日南地坼三月癸亥日食

帝紀二月己卯

日南地坼三月癸酉日食本志及素紀皆云三月己卯日南地坼按長歷是年二月壬辰朔無己卯三月壬戌朔癸酉十二日不應日食二月當是乙卯三月當是癸亥

十月涼州刺史皮楊

紀作皮陽今從西羌傳

二年八月詔班雄屯三輔

帝紀冬十月遣任尚屯三輔按西羌傳司馬鈞龐參抵罪

後尚乃代雄屯三輔耳

右扶風仲光

袁紀作右扶風太守種嵩今從范書

十月龐參梁懂下獄馬融上書

懂傳曰懂為度遼將軍明年安定北地上郡皆

被羌寇不能自立詔懂發邊兵迎三郡吏民徙扶風界
懂即遣南單于兄子優孤塗奴將兵迎之既還懂以塗
奴接其家屬有勞輒授以羌侯印綬坐專擅徵下獄抵
罪明年校書郎馬融上書訟懂與參按懂為度遼將軍
在永初四年徙三郡民在五年參下獄
在今年不得云明年融訟之也疑傳誤

以虞詡為武都太守

詡傳曰羌寇武都太后以詡有將帥之略遷武都太守又曰賊敗散

南入益州本紀元初元年羌寇武都漢中據此似詡以
元初元年為武都太守也然按西羌傳龐參抵罪後任
尚屯三輔時詡猶為懷令說尚用騎兵袁紀亦云懷令
虞詡說尚如范書所言又云上問何從發此計尚表之

受於懷令虞詡由是知名遷武都太守以此驗之當在龐參抵罪後也

四年四月己巳鮮卑連休等入寇

范書鮮卑傳上作連休下作休連今從上

文

十二月大牛種封離等反

西南夷傳云五年叛今從帝紀

五年八月代郡鮮卑入寇殺長吏

獨行傳云元初鮮卑數百餘騎寇漁陽

太守張顯率吏士追出塞遙望虜營烟火急趨之兵馬掾嚴授慮有伏兵苦諫止不聽顯蹙令進授不獲已前戰伏兵發授身被十創歿於陣顯拔刀追散兵不能制虜射中顯主簿衛福功曹徐咸遽趣之顯遂墮馬福以身擁蔽虜并殺之朝廷愍授等節詔書褒歎厚加賞賜按元初凡六年鮮卑不曾犯漁陽殺長吏惟是入代郡

曾殺長吏今疑此漁陽
本是代郡史之誤也

永寧元年春北匈奴車師共攻殺後部司馬

班勇傳元初六年曹

宗遣索班屯伊吾後數月北單于與車師後部共攻沒
班按本紀永寧元年車師後王叛殺部司馬車師傳亦
曰永寧元年後王軍就及毋沙麻反畔殺後部司馬及
敦煌行事蓋班以去年末屯伊吾今春見殺或今春奏
到也

建光元年

陳禪傳曰北匈奴入遼東追拜禪遼東太守
胡憚其威彊退還數百里禪不加兵但使吏

卒往曉慰之單于懷服遺以胡中珍貨而去當在此年矣又
感化之單于懷服遺以胡中珍貨而去當在此年矣又
按北單于漢朝所不能臣未嘗入朝天
子安肯見遼東太守此事可疑今不取

七月壬寅馬英薨

傳作策罷
誤今從紀

九月戊子幸衛尉馮石府留飲十許日

素紀曰十二月
丙申乃還宮今

從石
傳

延光元年四月龐奮斬姚光收馮煥

帝紀建光元年四
月甲戌龐奮承偽

璽書殺姚光

馮緄傳亦云建光元年按帝紀去年十二
月高驪圍玄菟而高驪傳有姚光上言蓋光實以延光

元年被殺紀傳誤以延為
建又今年四月無甲戌

三年三月楊震上疏曰去年十二月四日京師地動

震
傳

作十一月四日按下文其日戊辰十
一月丙申朔戊辰乃十二月四日也

四年三月立北鄉侯懿

東觀記續漢書作北鄉侯攢今從袁紀范書

十月閭崇屯平朔門

宦者傳作朔平門今從玄紀

順帝永建元年八月三公劾奏虞詡上書自訟

詡傳云帝

省其章乃為免司空陶敦按袁紀孫程就國在九月而敦免在十月蓋帝由此知敦不直因事免之不然何三府共奏而獨免敦也

孫程等就國

袁紀秋七月有司奏浮陽侯孫程祝阿侯張賢為司隸校尉虞詡訶叱左右謗詆大

臣妄造不祥于亂悖逆王國等皆與程黨久留京都益其驕溢詔免程等徙為都梁侯程怨恨封還印綬更封為宜城侯范書孫程傳亦云坐訟虞詡訶叱左右就國按虞詡傳程言見用上不以為怒周舉傳云程坐爭功

就國今從之

二年帝設壇見樊英

英傳云四年三月乃設壇場見英黃瓊傳李固勸書已云樊英設壇

席及瓊至上疏薦英稱光祿大夫則是瓊至之時英已嘗設壇見之而為光祿大夫矣至三年旱瓊復上疏若四年方設壇場見英則都與瓊傳異知其必不在四年也

永和二年三月丁丑郭虔為司空

袁紀作乾今從范書

五月黃龍等九侯與宋娥更相賂遺發覺並遣就國

孫程

傳云龍等誣罔曹騰孟賁按梁商傳誣罔騰賁者張達等非龍等也

三年八月丙戌令公卿舉武猛

官者傳云陽嘉中詔舉武猛良賀獨無所薦按

此詔蓋誤以永和為陽嘉也

六年三月武都太守趙冲擊鞏唐羌

西羌傳作武威太守今從帝紀皇甫

規傳云與護羌校尉趙冲按西羌傳冲時尚為太守規傳誤也

夏鞏唐羌寇北地

西羌傳作罕種羌今從帝紀

漢安元年八月張嬰詣張綱降

帝紀九月張嬰寇郡縣又云是歲嬰詣綱降按

張綱傳云寇亂十餘年則非今年九月始寇郡縣也袁紀置嬰降事於八月下十月上今從之

三年六月丙寅立兜樓儲為南單于

袁紀去年六月立兜樓儲為單于今

從范書

建康元年八月遣馮緄督州郡討賊帝紀作馮赦袁紀作馮放皆誤今據

緄傳

九月皇甫規對策梁冀忿之遂廢於家積十餘年規傳云沖

質之間規對策免歸積十四年檢帝紀此後別無舉賢良事或者此時規舉賢良其至對策時已在質帝世也故云沖質之間自明年數至梁冀誅亦整十四年也

十一月馬勉稱皇帝帝紀永嘉元年三月勉稱皇帝今據滕撫傳

永嘉元年袁紀作元嘉誤

十一月丁未趙序坐畏懦不進詐增首級棄市東觀記曰取錢

繅三百七十五
萬今從滕撫傳

金蛇輸司農

種暘傳云二府畏懦不敢按之今從杜喬傳

桓帝建和元年六月光祿勳杜喬為太尉

帝紀云大司農杜喬傳喬

自司農累遷為大鴻臚光祿勳乃為太尉袁紀亦然荀淑傳云光祿勳杜喬舉淑方正今從之

七月杜喬諫封梁冀等

喬傳此章在為太尉前袁紀在為太尉後今從袁紀

八月乙未立皇后梁氏

皇后紀袁紀皆云八月而無日帝紀云七月乙未以長歷考之

七月戊申朔無乙未乙未八月十八日也蓋帝紀脫八月字

十一月梁冀誣杜喬請按罪太后不許

喬傳云策免而已喬前已免官

傳誤也

元嘉元年四月己丑上微行私幸河南尹梁肩府舍

袁紀

作梁不疑府
今從范書

二年正月敦煌太守馬達

車師傳作司馬達今從于闐傳

永壽元年秋南匈奴左薁鞬臺耆且渠伯德等反

帝紀作左

臺且渠伯德等
叛今從張奐傳

二年七月李膺為度遼將軍

袁紀延熹二年六月鮮卑寇遼東度遼將軍李膺擊

破之今
從范書

十二月封梁不疑子馬梁睂子桃為侯

袁紀馬桃封在建和元年馬作

焉桃作桃
今從范書

三年十一月司徒尹頌薨

袁紀在六月
今從范書

延熹元年五月梁冀殺陳授帝由此發怒

袁紀曰冀以私憾專殺議

郎郎尊上益怒
之今從范書

十二月陳龜為度遼將軍

按匈奴傳每除度遼將軍輒書之此陳龜及前李膺後种

嵩皆不紀一時既不當有
兩官今約其事分著前後

詔遣南單于車兒還庭

袁紀元康元年四月中郎將張奐以車兒不能治國事上言更

立左鹿蠡王都紺為單于詔不許
范書匈奴傳在延熹元年今從之

二年七月黃門令具瑗

宦者傳作中常侍今從梁冀傳

八月陳蕃薦徐穉等

范書徐穉傳云延熹二年尚書令陳蕃僕射胡廣等上疏薦穉

五年尚書令陳蕃薦五處士按二年胡廣已為太尉五年蕃已為光祿勳今置在二年從范書去廣名從袁紀

楊秉按單超兄子匡坐論作左校叔孫無忌寇暴徐充

第五種坐徙朔方

楊秉傳作超弟宦者傳作弟子今從第五種傳范書李雲死在延熹三年

春袁紀在二年秋按楊秉傳三年坐救雲免歸田里其年冬復徵拜河南尹坐單匡使客任方刺衛羽繫獄亡走論作左校第五種傳匡遣客刺羽超積忿以事陷種若如范書則雲死時單超已卒何得更能陷種又雲書

所論者立鄧后與封五侯事皆在二年。素紀似近之。種傳又云衛羽為種說叔孫無忌無忌率其黨與三千餘人降。按帝紀延熹三年十一月無忌攻殺都尉侯章又臧旻訟種書稱種所坐盜賊公負筋力未就。然則種必不能降無忌。此說妄也。

三年正月左回天具獨坐徐卧虎唐雨墮

太子賢注范書雨墮作兩

墮云謂隨意所為不定也。諸本雨或作兩。按雨墮者謂其性急暴如雨之隨無有常處也。

四年二月种暘為司徒

素紀在去年按祝恬薨後有歲允允免暘為司徒相去半年素

紀誤也今從范書

五年十月度尚為荊州刺史馮緄討武陵蠻

帝紀三年十二月武

尚討長沙蠻平之此事當在今年三年重出誤也

七年二月丙戌黃瓊薨

范書四年瓊免司空至七年卒

秉五年代劉矩為太尉袁紀此

年瓊卒秉乃為太尉今從范書

十二月誅寇榮

袁紀置此事於延熹元年按范書榮傳

赦再贖不知榮死果在何年按襄楷竇武上書皆言梁孫寇鄧之誅今置於此

八年正月楊秉劾奏宦官

楊秉傳南巡之明年秉劾侯覽則是在此年矣宦者傳韓

演奏具瑗瑗坐奪國為鄉侯與秉傳所云削瑗國共是一時事明矣而袁紀載在去年春與范不同今從范書

五月張磐會赦不肯出獄

按張磐會赦得原檢帝紀此後未有赦不知會何赦也六

年三月赦前此二年永康元年
六月赦後此二年今從帝紀

九年七月富賈張況

陳蕃傳作張況謝承書
作張子禁今從岑暉傳

張儉舉奏侯覽

素紀儉行部至平陵逢覽母儉按劔怒
曰何等女子干督郵此非賊邪使吏卒

收覽母殺之追擒覽家屬賓客死者百餘人皆僵尸道
路伐其園宅并堙木刊雞犬器物悉無餘類苑康傳亦
云張儉殺侯覽母按其宗黨或有逆匿太山界者康窮
相收掩無得遺脫覽大怒之徵詣廷尉坐徙日南按侯
覽傳云覽喪母還家陳蕃傳云翟超沒入侯覽財產坐
髡鉗皆不云儉殺其母若果殺之則死康不止徙日南
也侯覽傳又云建寧二年喪母
蓋以誅黨人在其年致此誤耳

成瑨等下獄陳蕃劉茂共諫請之

陳蕃傳又有司徒劉
矩按時胡廣為司徒

非矩也

襄楷上疏曰前年冬竹柏傷枯

帝紀此年十二月書洛城傍竹柏枯傷誤也

司隸李膺促捕張成

黨錮傳云膺為河南尹按膺此事非作尹時也

牢脩上書誣告李膺等

袁紀作牢順今從范書

陳蕃上書極諫帝策免之

袁紀李膺下獄在九月范書蕃免在七月蕃傳上書極諫

曰膺等或禁錮閉隔或徙死非所云云按膺等赦出在明年六月再下獄死徙在建寧二年十月蕃既以此年

七月免則蕃傳所云疑非蕃書也又袁紀無陳蕃免事靈帝即位以太尉陳蕃為太傅按蕃免後有太尉周景

蓋袁紀誤也

永康元年五月竇武上疏曰今臺閣近臣尚書朱寓等

武傳武上疏曰今臺閣近臣尚書令陳蕃僕射胡廣尚書朱寓等按蕃廣時不為令僕故去之

六月黨人書名三府

帝紀於去年冬書李膺等二百餘人受誣為黨人並坐下獄書名三

府按陳蕃以訟李膺免即膺等下獄已在前後遇赦方得書名三府則帝紀所紀為兩無所用故去之又故書三府為王府劉敞曰當為三府

十二月迎解瀆亭侯宏時年十二

范書云即帝位年十二袁紀初立為嗣詔

書云年十有二建寧二年誅黨人時云年十四袁紀是也

靈帝建寧元年正月壬午竇武為大將軍

袁紀延熹九年四月戊寅

特進竇武為大將軍武移病固讓至于數十不許范書在今年二月壬午武傳為大將軍亦在迎立靈帝後今從之

陳蕃為太傅

帝紀拜蕃太傅在即位後傳在前緣有蕃責尚書等語故知從傳是也

九月辛亥朱瑀盜發竇武奏

范書帝紀作丁亥袁紀作辛亥按長歷是年九月乙

巳朔無丁亥今從袁紀

陳蕃聞難將官屬諸生拔刃突入承明門

袁紀蕃到承明門使者

不納曰公未被詔名何得勒兵入宮蕃曰趙鞅專兵向宮以逐君側之惡春秋義之有使者出開門蕃到尚書門正色云云今從范書

王甫使劔士收蕃送北寺獄

范書蕃傳曰蕃拔劔叱甫甫兵不敢近乃益人圍之

數十重遂執蕃送獄今據袁紀

二年四月壬辰青蛇見御坐癸巳大風雨電

帝紀建寧二年四月

癸巳大風雨電楊賜傳熹平元年青蛇見御坐續漢志熹平元年四月甲午青蛇見御坐袁紀建寧二年四月壬辰青蛇見癸巳大風按張奐傳論陳竇薦王李與袁紀相應今從之

九月郭泰聞黨人死私為之慟曰漢室滅矣

范書以泰此語為哭

陳竇袁紀以為哭三君八俊今從之

中常侍袁赦

袁紀作袁朗今從范書袁隗傳

熹平元年五月曹節等欲別葬竇太后陳球下議太尉

李咸上疏

袁紀云河南尹李咸執藥上書曰昔秦始皇幽閉母后感茅焦之言立駕迎母供養如初

夫以秦后之惡始皇之悖尚納直臣之語不失母子之恩豈況皇太后不以罪歿陛下之過有重始皇臣謹左手齋章右手執藥詣闕自聞如遂不省臣當飲鴆自裁下覲先帝具陳得失章省上感其言使公卿更議廷尉陳球乃下議與范不同今從范書

七月有人書朱雀闕言天下大亂曹節王甫幽殺太后

舊云常侍侯覽多殺黨人按侯覽已死恐誤今去之

十二月袁隗為司徒

袁紀在四年今從范書

三年三月嗣中山穆王暢薨無子國除

本傳云子節王稚嗣無子國除

與帝紀異未知孰是又不知
惟薨在何年今且從帝紀

六年四月旱蝗三公條奏長吏苛酷貪汚者陽球坐嚴

酷徵詣廷尉

本傳司空張顗條奏按顗光和元年為太尉未嘗為司空球光和元年陷蔡邕時已

為將作大匠不知被徵果在何年
唯熹平五年六年大旱故附於此

光和元年九月司空來豔薨

素紀云豔以久病罷今從范書

二年三月袁滂免劉邵為司徒

素紀二月丁巳滂免劉邵作劉邵今從范書

四月辛巳陽球奏收王甫下獄死曹節見磔甫屍道次

投淚曰我曹自可相食

素紀云球會虞貴人葬還入夏城門曹節見謁於道旁球大罵

曰賊臣曹節節收淚於車中而有是語今從范書

三年十二月己巳立何皇后

素紀在十一月今從范書

帝問侍中任芝樂松

范書云中常侍樂松松本鴻都文學必非中常侍素紀云侍中今從

之

四年九月劉寬免許馹為太尉

素紀十月許郁坐辟召錯繆免楊賜為太尉今

從范書

閏月楊賜免十月陳耽為司徒

素紀三年閏月楊賜久病罷十月陳耽為司徒

蓋誤置閏于去年按長厯此年閏十月以素紀考之閏九月為是恐長厯差一月今從范書帝紀

五年正月陳耽上言

劉陶傳光和五年以謠言舉二千石耽與議郎曹操上言按耽已為

司徒不應與議郎同上言王沈魏書曰是歲以災異博問得失太祖因此上書切諫不云與耽同上言也今但云陳耽

六年冬

本紀云大有年按今夏大旱縱使秋成亦不得為大有年今不取

張角置三十六方

素紀作坊今從范書

中平元年春濟南唐周告張角反

素紀云濟陰人唐客今從范書

車裂馬元義

素紀曰五月乙卯馬元義等於京都謀反伏誅今從范書

二月角自稱天公將軍角弟寶稱地公將軍寶弟梁稱

人公將軍

司馬彪九州春秋云角弟梁寶弟

張鈞上書請斬十常侍

范書宦者傳上列常侍十二人名而下云十常侍未詳

七月巴郡張脩反

范書靈帝紀有此張脩陳壽魏志張魯傳有劉焉司馬張脩劉父典略有

漢中張脩裴松之以為張脩應是張衡非典略之失則傳寫之誤按魯傳云祖父陵父衡皆為五斗米道衡死魯復行之劉焉司馬張脩與魯同擊漢中魯襲殺脩非其父也今此據范書

十二月王允下獄袁隗楊賜上疏請之

允傳云太尉袁隗司徒楊賜按

隗賜時皆不為此官恐誤

三年二月趙忠為車騎將軍傳燮出為漢陽太守

索紀在明

年九月今
從范書

四年四月傳燮戰歿

索紀在明年五月今從范書

十月長沙賊區星

范書作觀鵠今
從陳壽吳志

五年三月益州刺史郤儉

范書作郝儉今
從陳壽蜀志

南匈奴右部醯落攻殺單于羌渠

帝紀休屠各胡攻殺
并州刺史張懿遂與

南匈奴左部胡合殺
其單于今從匈奴傳

八月置西園八校尉

范書索紹傳紹為佐軍校尉何進
傳淳于瓊為佐軍校尉今從樂資

金史卷之二

卷二

山陽公

載記

十月甲子帝講武問蓋勲

勲傳云勲時與宗正劉虞佐軍校尉袁紹同典禁兵勲謂

虞紹云云按虞於匈奴未叛之前已為幽州牧又宗正非典兵之官今除之

六年四月劉虞為太尉

袁紀三月己丑光祿劉虞為司馬領幽州牧今從范書

戊午皇子辯即位年十四

帝紀云年十七張璠漢紀曰帝年十四今從之

中常侍郭勝

元紀作郭脉九州春秋作郎勝今從何進傳

六月辛亥董后暴崩

九州春秋曰太后憂懼自殺今從皇后紀

七月皇甫嵩從子鄺

袁紀作從子邈今從范書

何進召董卓

進傳曰召卓屯關中上林苑按時卓已駐河東若屯上林則更為西去非所以脅太

后也今從卓傳

袁術燒南宮青瑣門

何進傳作九龍門今從袁紀

十月白波賊寇河東

帝紀五年九月南單于叛與白波賊寇河東按匈奴傳帝崩之後於

扶羅乃與白波賊為寇紀誤今從傳

十二月尚書武威周璽城門校尉汝南伍瓊

范書云吏部尚書漢

陽周璽侍中汝南伍瓊袁紀作侍中周璽今從魏志及英雄傳


孔伷為豫州刺史

九州春秋作孔胄今從董卓傳

韓馥聽袁紹舉兵

范書魏志俱有此事范書在舉兵之後魏志在舉兵之前若在舉兵後時

紹已為盟主馥何敢禁其發兵若在舉兵前則近是也今從魏志



資治通鑑考異卷二